

Arkiv: <arkivID><jplID> FE-223, FA-C11
JournalpostID:
Sakshandsamar:
Dato: 14.03.2022

Saksframlegg

Saksnr.	Utval	Møtedato
026/22	Alver formannskap	24.03.2022
	Alver kommunestyre	

**Refusjonsordning for eigenbetaling/kontingent - fritidsaktivitet for flyktningbarn og -ungdom
Kommunedirektøren sitt framlegg til vedtak:**

1. Alver kommunestyre godkjenner oppretting av søkbar ekstraordinær tilskotsordning for 2022, til inndekking av eigenbetaling/kontingent ved organisert fritidsaktivitet for flyktningbarn- og ungdom.
2. Alver kommunestyre godkjenner at Kommunedirektøren fastset retningslinjer basert på prinsippunkta i saka, lyser ut ordninga, og at tilskotsordninga vert forvalta på delegert vedtak ut 2022.
3. Alver kommunestyre løyver kr 200 000 til gjennomføring av tiltaket.
4. Midlane vert henta frå disposisjonsfondet
5. Status for ordninga vert orientert utval for oppvekst, kunnskap og kultur

Alver formannskap 24.03.2022:

Handsaming:

Kommunedirektøren sitt framlegg vart samrøystes vedteke.

FO- 026/22 Vedtak:

1. Alver kommunestyre godkjenner oppretting av søkbar ekstraordinær tilskotsordning for 2022, til inndekking av eigenbetaling/kontingent ved organisert fritidsaktivitet for flyktningbarn- og ungdom.
2. Alver kommunestyre godkjenner at Kommunedirektøren fastset retningslinjer basert på prinsippunkta i saka, lyser ut ordninga, og at tilskotsordninga vert forvalta på delegert vedtak ut 2022.
3. Alver kommunestyre løyver kr 200 000 til gjennomføring av tiltaket.
4. Midlane vert henta frå disposisjonsfondet
5. Status for ordninga vert orientert utval for oppvekst, kunnskap og kultur

Politisk handsaming

Saka skal til innstilling i formannskapet

Saka skal avgjerast i kommunestyret

Bakgrunn

Saka har bakgrunn i den pågåande krigen i Ukraina, og forventar flyktningstraum til Noreg og Alver.

Det breie kulturfeltet har tydelege roller og høve for å rette innsats mot flyktningar, òg med basis i lokal erfaring frå tidlegare arbeid i Alver og dei tre tidlegare kommunane.

Per no førebur kulturtenestene ny innsats knytt til den tidlegare kommunale flyktningfadderordninga, innsamling og formidling av klede og utstyr, koordinering og samarbeid med frivilligheita, kartlegging av intern kompetanse og språkkunnskap, tilgjengeleggjering av ukrainsk- og russiskspråkleg litteratur, og informasjonsarbeid. I tillegg vert det kartlagt høve for innsats på lenger sikt.

Storparten av det organiserte kulturtilbodet i Alver vert drifta av lag og organisasjonar. Saka kastar lys på høva for å etablere ei enkel tilskots- og refusjonsordning knytt til utgifter ved å tilby plass innan organisert aktivitet til barn og ungdom som har flykta til Alver.

Saksopplysningar:

Per 15. mars melder FN's høgkommissær for flyktningar at 3 millionar ukrainarar så langt har flykta frå krigshandlingane i landet. Utviklinga viser konstant aukande tal på flyktningar frå krigen.

UDI har avgjort eit mellombels kollektivt vern for ukrainarar, og Noreg må førebu seg på ein stor flyktningstraum. Mange ukrainarar bur allereie i Noreg hos familie og vener på turistvisum, og manglar rettar som elles er knytt til asylregimet eller mellombels opphaldsløyve. Det er vidare usikkerheit knytt til lengda av krisa, kor mange som vil søkje asyl og som skal busettast. Ein kan forvente at ein større gruppe vil kunne opphalde seg i området før dei får rett på busetting.

Stordelen av flyktningane er kvinner og barn, og det er behov for brei innsats for å ta vare på sårbare menneske og inkludere dei i lokalsamfunnet på både kort og lenger sikt.

Kulturen og idretten i Alver er engasjerte og inkluderande aktørar, som er kjende for å stille opp. Inkludering i eksisterande aktivitet i nærmiljøet er eit tiltak vi kjenner som sentralt for å ta betre vare på sårbare barn og unge.

Prinsipp for ordninga:

Kommunedirektøren tilrår følgjande prinsipielle grunnlag for ordninga:

Formål:

Formålet for ordninga er å bøte på psykososiale skadeverknadar for sårbare flyktningbarn og -ungdom, og bidra til å inkludere desse i eksisterande aktivitet i nærmiljøet.

Økonomiske rammer:

Ordinga får ei ramme på kr 200 000 for 2022. Dersom behovet aukar utover dette, vil ein komme tilbake til status for ordninga og eventuell auka finansiering.

Kven omfattast av ordninga

Ordinga er retta mot flyktningbarn og -ungdom, som er busette eller oppheld seg i Alver.

Ordinga vil òg gjelde flyktningar frå andre land enn Ukraina.

Kva omfattast av ordninga

Inndekking av eigenbetaling og kontingent ved eksisterande organiserte fritidstilbod i Alver kommune, for flyktningbarn og -ungdom. Øvre grense er til og med 19 år.

Ordinga kan òg dekke mindre utgifter til personleg utstyr for å delta i aktiviteten, dersom dette ikkje kan skaffast på annan måte.

Søknadsprinsipp

Organisasjonen søker kommunen om inndekking for eigenbetaling/kontingent for eit tal plassar på eksisterande organiserte aktivitetar. Dersom søknaden vert positivt handsama, får søker refunderert godkjende utgifter fortløpande når plassane vert fylde.

Barnet/ungdommen skal gå inn og delta som normalt medlem av organisasjonen. Om ikkje søker frå før praktiserer inkluderingskontakt, bør tilsvarende funksjon etablerast.

Inkludering av flyktningbarn/ungdom er eit grunnleggjande premiss for ordninga.

Andre tilhøve

Kulturskulen

Kulturskulen har auka tilbodet og elevtalet i Alver samanlikna med dei tidlegare kommunane, men har svært låge ventelister, som er i hovudsak knytt til stadbundne tilbod. I løpet av eit kulturskuleår vert det normalt somme ledige plassar, som kan om mogleg tilgjengeleggjerast for flyktningbarn og -ungdom utan å få konsekvens for andre barn og unge på venteliste.

Erfaring frå arbeid med å tilby elevplassar til flyktningbarn- og ungdom frå tidlegare, har vist somme praktiske og formelle utfordringar ved refusjon av eigenbetaling. Ordninga som ligg føre kan inkludere kulturskuletilbodet, utan å krevje generell auke av kulturskuledriftas rammer. Dersom det vert behov for å tilby eit større tal plassar, vil dette måtte vurderast og handsamast utanfor ordninga omtalt i denne saka.

Kommunedirektøren tilrår at ordninga omfattar eventuelle tilgjengelege kulturskuleplassar.

Alver kulturråd og Alver idrettsråd

Saka har vore drøfta i dialog med kulturrådet og idrettsrådet, som uttrykker at dei er positive til tiltaket, og har ingen merknadar.

Det har ikkje vore høve til å sende saka til full høyring til idrettsrådet og kulturrådet grunna avgrensa tid.